



## ATASSUT INATSISARTUNI

ATASSUT

UPA14/157-1

Knud Kristiansen

28.05.2014

**Sinerissami tarnimikkut nappaatillit assigiaarnerusumik pitsaanerusumillu sullinnejarnissaat anguniarlugu Namminersorlutik Oqartussat kommunillu qanoq iliuuseqarsinnaanerat pillugu apeqquteqaat aallaavingalugu oqallisissiaq.**

(Inatsisartunut ilaasortaq Agathe Fontain, Inuit Ataqatigiit)

Matumani Inuit Ataqatigiit sinnerlugit Inatsisartuni ilaasortap Agathe Fontain apeqquteqaat aallaavingalugu oqallinnissamut siunnersuutanut imatut ATASSUT sinnerlugu oqaaseqaateqassaagut:

ATASSUT-mit apeqquteqaat aallaavingalugu oqallinnissamik siunnersuuteqartoq paasilluinnarpalut tunngavilersuinermini erseqqissaatigimmagu inuit pingasut akornanni ataatsip tarnimikkut nappaammik inuunerup ingerlanerani eqqugaasoqartarnerani pisariaqartoq innuttaasut ataavartumik nappaatillit ikiorluarneqartarnissaannik qulakkeerinninniarnissaq.

ATASSUT-mit aamma Naalakkersuisut akissuteqarnerminni erseqqissaatai paasilluarpavut aammalu tusaatissatut tigullutigit. Taamaattorli ATASSUT-mit pisariaqartipparput suli ersarinnerusumik paasisaqarfingissallugit qanoq kommunit suleqatigineqarnersut?

Sumiiffinni assigiinngitsuni innuttaasut qanoq atugassaqartitaanerisa assigiaarnerusumik pineqarsinnaanerinut tikkuussinissamik ATASSUT-mit pisariaqarluinnarsorivarput qulaajaalluartoqarsimanissaa – aap, ajorinngilluinnarpalut qarasaasiatigut internet-ikkut attaveqaatit atorlugit ungasianiit sullissinerup ingerlanneqarsinnaanera periarfissarsiuunneqartoq, taamaattumik ATASSUT-mit paaserusupparput maannakkut misileraataagallartumik ingerlatsineq qanoq sivisutigisumik ingerlanneqarnissaa naatsorsuutigineqarnersoq?



## ATASSUT INATSISARTUNI

---

Suli misileraataasumik ingerlatsitsinerungaluartoq taamaattoq ATASSUT-mit neriuutigaarput ataavarnerusumik aaqqiinissat piaartumik inissinneqarumaartut, taamaasillutilu aamma aningaasalorsorneqarnissaanut periarfissat maannagaaq misissorneqalereersinnaajumaarlutik.

Kalaallit Nunaanni isorartoqisumi inuuneq imaannaanngilaq aammalu sumiiffinni assigiinngitsuni inoqarfiusuni tupinnangitsumik atugassaritaasut assigiinngeqalutik aammalu arlaatigut taamaattuassalluni. Taamaattorli ATASSUT-mit isumaqarpugut innuttaasut ataavartumik tarnimikkut nappaatillit tunngaviusumik ikiorneqarsinnaanissaannut assigiinnik imaluunniit assigiinnerusunik atugassaqartinnissaannut aqqutissiuussinissaq avaqqunneqarsinnaasorinngilarput.

Aammattaaq ATASSUT-mit isumaqarpugut pingaaruteqarluinnartuusoq eqqumaniarfigissallugit tarnimikkut nappaatillit ilaquaasa annerusumik ikorfartorneqarnissaannut ikiorneqarnissaannullu iliuusissanik tikkuussisoqartariaqartoq. Ukiunimi kingullerni annertusiartuinnartumik nunani allani eqqumaniarfigineqaleraluttuinnarpoq tarnimikkut nappaatilinnut ilaquaasut ilanngullugit ikorfartorneqarlutik ikiorneqaraagata aamma tarnimikkut nappaatillit ikiorneqarneranut tapersersortaasinnaanerisa iluaqutaalluartarneri.

Taamatuttaaq aamma ATASSUT-mit siunnersuuteqartoq isumaqatigaarput inuiaqatigiinni tarnimikkut nappaatillit akuuneruleqqissinnaanissaannut aqqutissiuussineq ingerlanneqartariaqartoq, ATASSUT-mit tassani pingaartipparput kommunit, sulisitsisut aamma inuutissarsiutillit kattuffii qanimat suleqatigalugit aaqqiissutissanik nassaarniarsinnaanissaq.

Taamatut ATASSUT-mit annertunngikkaluamik oqallisissiamut ilanngussinitigut neriuutigaarput sulianut maanna ingerlanneqalereersimasunut oqariartutigineqartut ilanngullugit eqqumaniarfigineqarumaartut.